

- vgl. Fd. 6 266
1. Lutheri / Martini: anlegung  
 des propheeten Jona Eifurt  
 Rom 1526, 12. gab diese abdruckt
  2. Christi: Das ist mein lieb  
 auf fesse Rosen 1527, 12  
 gedrukt durch Gabriel Kantz
  3. Sermon vom Sacra-  
 ment des Eibes und  
 Blutes Christi, Witten-  
 berg 1526, 12,

vgl.  
 an se  
 3517a  
 in  
 Aug



Handwritten text, likely bleed-through from the reverse side of the page. The text is mirrored and difficult to decipher but appears to contain several lines of script.

Handwritten text, likely bleed-through from the reverse side of the page. The text is mirrored and difficult to decipher but appears to contain several lines of script.

Handwritten text, likely bleed-through from the reverse side of the page. The text is mirrored and difficult to decipher but appears to contain several lines of script.



# Eyn Sermon von dem Hochwirdigen Sacrament: des

heyligen warē Leychnamß  
Christi. Vnd von den  
Bruderschafften.



**Z**um ersten. Das heylige Sacramēe  
des Altars vnd des heyligen waren  
leychnams Christi/ hatt auch drey ding/  
die man wissen muß. Das erst ist / das  
Sacrament odder zeychen. Das ander/  
die bedeutung des selben sacraments. Das  
dritte / der glaub der selben beyde / wie denn  
ynn eynem yglichen sacrament / diße drey  
stück seyn musen. Das sacrament muß  
eußerlich vñ sichtlich seyn / ynn eynem leyp-  
lichen form odder gestalt. Die bedeutung /  
muß ynnerlich vnd geystlich seyn / yñ dem  
geyst des menschen. Der glaub muß die  
beyde zusammen zū nutz vñ yñ den brauch  
bringen.

**Z**um andern. Das sacrament oder

ußerlich zeychen / steet ynn der form vnd  
gestalt des brots vnd weyns / gleych wye  
die Tauffe / yn dem wasser / so doch / das  
man des brotis vnd weyns nieße mit essen  
vnd trincken / gleych wie man der Tauffe  
wasser neußt vnd dreyn senckt oder damit  
Begeuffet. Denn das sacrament oder zey-  
chen muß empfangen odder yhe begerd  
werden / solles nutz schaffen / wie wol mā  
tzt / mit beyder gestalt dem volck alle tag  
gibt / wie vorzeyttē / vñ noch seyn solt / so  
neußet yh: doch alle tag die püsterschafft /  
für dem volck / vñ muß dz volck seyn teg-  
lich begere / vñ zur zeyt / eyner gestalt sovil  
die tyrannische Kirch ordenet vñnd gibt /  
empfahen.

¶ Zum drittē. Es ist aber bey mir für  
gut angesehen / das die Kirch / ynn eynem  
gemeyn Concilio / widdereß vorordenete /  
das man allen menschen beyder gestalte  
gebe / wie den püstem. Mit darumb / das  
nott sey eyne odder beyde gestalte / so doch  
wol alleyn des glaubēs begirde gnug ist.  
Als s. Aug. spricht / Was bereytist du den  
bauch vñ die zeen / glawß nur / so hastis  
das sacrament schon genossen / sondern  
das es zimlich vñ seyn were / so des sacra-  
ments gestalt vnd forme odder zeychen /



andern glydmas vnd 8 gärten stat. Also  
alle heyligen sind Christi vñ der Kirchen  
glied / die eyn geystlich ewige gottis stadt  
ist / vnd wer ynn die selben stadt genōmen  
wirt / der heyst ynn die gemeyne der heylig  
gen genōme / vñ mit Christ' geystlichem  
corper vorleybet vñd seyn glyd gemacht.  
Widderuß Excommunicare / heyst / von 8  
gemeyn thun / vñd eyn glyd von diesem  
corper absondern / vñd das heyst auff  
deutsch / ynn den ban thun / doch vnter  
schiedlich / wie ym folgenden sermon von  
dem ban ich sagen will. Also ist dis sac  
rament ynn brott vnd weyn empfaben /  
mit anders / den eyn gewis zeychen empfa  
hen / diser gemeynschafft vnd eynleybung  
mit Christo vnd allen heyligen. Gleych  
ob man eynem burger eyn zeychen / hand  
schufft / oder sonst eyn loßung gebe / das er  
gewis sey er soll der stadt burger / der selbe  
gemeyn glydmas seyn. Also sagt Sanct  
Paulus. 1. Corinth. 10. Wir seyn alle eyn  
brott / vñd eyn corper / die wir von eynem  
brott vñ von eynem kilch teyll nehmen.

¶ Zum funfften. Dese gemeynschafft /  
stehet darynne / das alle geystlich guter  
Christi vñd seynes heyligen / mit geteyllet.



vnd gemeyn werden/dem/der dyß sacra-  
ment empfeht/widderumb alle leyden vñ  
sund auch gemeyn werden/ vñ also liebe  
gegen liebe antzundet wirt vñ voreynigt.  
Vnd das woyr auff der groben synlichen  
gleychniß bleyben Wie ynn eyner stadt/  
eynem yglichen burger gemeyn wirt / der  
selben stadt/namen/ehre/freyhet/handell/  
brauch/sitten/hulff/beystand/schutz/vnd  
der gleychen. Widderuß/alle gefar / feror/  
wasser/seynd/sterben/scheden/auffsetz/vñ  
der gleychen Den wer mit geniessen wil/  
der muß auch mit gelten/vnd lieb mit lieb  
vorgleychen. Sie sichte man/das/ wer ey-  
nem burger leyde thut/der thut der ganzē  
stadt vnd allen burgern leyde / wer eynem  
wol thut/vordinet vñ allen andern gunst  
vnd danck.

Also auch/ym leyplichen corper / wie  
S. Paulus sagt. 1. Corinth. 12. da er diß  
sacramēt geystlich vorkleret. Die gliedmas  
sind fureynāder sorgfeltig/wo eyns leydet/  
da leyde die andern alle mit, wo es eynem  
woll gehet / da frewen sich mit yhm die  
andern. So sehen woyr / thut yemant d fuß  
wee/ia das kleynist zinleyn / so sicht das  
aug darnach/greyffen die finger / rumpset

sich das angesicht/ vnd der gantz corper  
böget sich dahyn/ vñ haben alle zuthun/  
mit dem kleynen glydmaßlyn / widerüb/  
wart man seyn woll / so thut es allenn  
gliedmaßen woll. Dese gleychnuß muß  
man woll mercken / so mā diß sacramēt  
vorstehn will/ denn die schrift braucht d  
selben vmb der eynfeltigen willen.

¶ Zum sechsten. Also ynn diesem sac  
rament / wirt dem menschen/ eyn gewiß  
zeychen/ von got selber geben / durch den  
puester/ das er mit Christo vñ seynen heyl  
ligen/ soll also vereynigt vnd alle ding  
gemeyn seyn/ das Christus leyden vñ lebē  
soll seyn eygen seyn / dartzu aller heyligen  
leben vnd leyden. Also / das wer yhm leyde  
thut/ d thut es Christo vnd allen heyligē/  
wie er sagt durch den propheten. Wer  
euch rüret/ der rüret meyn augapffel/ wider  
derumb / wer yhm woll thut / der thut es  
Christo vnd allen seynen heyligen/ wie er  
sagt. Matt. 25. Was yhr eynem auß  
meynen geringsten than habt/ dz habt yhr  
mir than. Widderumb muß der mensch  
auch lassen yhm gemeyn seyn / alle bes  
chwerung/ vnd vnfall Christi vñ seynere  
heyligen/ mit yhn gleych geltē vñ messen/

die beyde wollen wyl Bass Betrachten.

¶ Zum siebenden. Tu thut vnß leyde  
mit eynerley widderspart. Es ist zu ersten/  
die vbrige vnnnd nachgelassen sund ym  
fleysch/nach der Tauff / die neygung zu  
Zorn/hass/hoffart/vnd vnkeyscheytzc. die  
vns ansicht/die weyll wir leben. Da be-  
durffen wir nit alleyne/hulffe der gemeyne  
vñ Christi/dz sie mit vns darwidder sech-  
ten / sondern auch not ist/das Christus  
vnd seyne heyligen fur vns treten fur gott/  
dz vns die sund nit werde gerechnet/ nach  
dem gestrengen vnteyl gottis. Darumb vns  
zu stercken vnd ermannen wider die selbē  
sund / gibe vns gott diß sacrament / als  
sprech er. Sihe da/dich sichtet manicher-  
ley sund an/nym hyn diß zeychen/damit  
ich dir zusage/das die sund / mit dich als  
leyne/sondern meynen sun Christum/ vnd  
alle seyne heyligen / ynn hymel vnd erden/  
ansicht. Drum sey frisch vnd getrost/ du  
streyst nit alleyn/groß hulff vñ beystant  
vmb dich ist. Also spricht d̄ künig David  
von diesem Brott / das brott stercket des  
menschē hertzen. Vñ gibe auch die schrifft  
an mehr orten diesem sacrament/die art d̄  
sterckung/ als Act. 9. von sanct Paulus.

A v

Er ist getaufft worden vnd hat die speyß  
empfangen/da ist er gesterckt wordē. Zu  
andern sicht vns an/d böß geyst / an vn-  
terlaß mit vielen sunden vñ widderwertig-  
ckeyten. Zum datten/ die welt/die voller  
bößheyt ist/die reytzet vnd verfolget / vnd  
ist auff keyner seyten gut. Zu letzt sicht  
vns an/vnser eygen böß gewissen von ges-  
tanen sunden. Item des tods furcht vnd  
d helle peyn. Wilch alle sampt vns müde  
vnd matt machen/so wir nit sterck suchē  
vnd hetten yn dyßer gemeynschafft.

¶ Zum achten. Welcher nu vertzaget  
ist/den seyn sundlich gewissen schweche/  
odder der todde erschreckt / oder sonst eyn  
Beschwoerung seyns hertzen hatt. Will er  
der selben loß seyn/so gehe er nur frölich  
zum sacrament des altars/vund lege seyn  
leyd yn die gemeyn/vund suche hulffe bey  
den ganzen hauffen des geystlichen cor-  
pers. Zu gleych als wan eyn burger auff  
dem land eyn schaden odder vnfall von  
seynen feynden erlitten/seynen radt herren/  
vnd mit burger das klage vnd vmb hulff  
anruffet. Darumb ist ym disem sacra-  
ment vns gebē die vnmeslige gotis gnad  
vñ barmhertzigeyt/das wir da allen ym

mer/ alle anfechtung / von vns legen auff  
die gemeyn/ vnd ſonderlich auff Chriſto.  
Vñ der menſch frölich ſich mag ſtercken/  
troſten/ vñ alſo ſagen. Bin ich eyn ſun-  
der/ hab ich gefallen/ trifft mich diß oder  
das vnglück/ wolan/ ſo gehe ich daher  
zum ſacrament/ vnd nym eyn zeychen vñ  
gott/ das Chriſtus gerechticheyt/ ſeyn lebē  
vnd leyden für mich ſteht/ mit allen heylig-  
en Engeln vnd ſeligen ym hymell vñ  
frummen menſchen auff erden. Soll ich  
ſterben/ ſo byn nit alleyn ym tot/ leyd ich/  
ſie leyden mit mir. Es iſt aller meyn vnſal  
Chriſto vñ den heyligen gemeyn worden/  
darumb das ich yhier lieb gegen mir eyn  
gewiſß zeychē hab. Sich dz iſt die frucht  
vñ brauch dyſes ſacraments/ dauon das  
hertz muß frölich vnd ſtarck werden.

¶ Zum neunnden. Wan du alſo diß  
ſacraments genoſſen haſt odder niessen  
wilt. So muſtu widderumb auch mit  
tragen der gemeyn vnſal wie geſagt iſt.  
Wilch ſeyn aber die? Chriſtus ym hymell/  
vñ die Engel mit den heyligen haben  
kein vnſal / denn alleyn / ſo der warheyt  
vñ gottis wort nachteyl geſchicht. Ja  
es trifft ſie (wie geſagt) alles. leyd vñ lieb

aller heyligē auff erden. Da muß nu deyn  
hertz sich ynn die lieb ergeben/ vnd lernen/  
wie diß sacrament/ eyn sacrament d lieb  
ist/ vñ wie dir lieb vnd beistand geschehe/  
widderumb lieb vñnd beystand erzeygest  
Christo ynn seynen durfftigen. Denn hie  
muß dyr leyd seyn alle vnehre Christi/ ynn  
seynem heyligen wortt/ alle elend d Chri-  
stenheyt/ alle vnrecht leyden der vnschul-  
digen/ des alles zumall/ vberschwenck-  
lich vill ist an allen ortern der welt / hie  
mußtu/ weren/ thun / bitten/ vnd so du nit  
mehr kanst / hertzlich mitleyden haben.  
Sich das heyst denn widderumb tragen  
Christus vnd seynen heyligen vnfall/ vnd  
widderwertickeyt/ da geht denn der spuch  
Pauli. Eynen trag des andern pürden/ so  
erfullet yhr Christus gepott

Sihe so tregstu sie alle/ so tragen sie  
dich widder alle/ vñ seynd alle ding ley-  
che/ vnd mag der böße geyst widder die ges-  
meyn nicht bestehn. Also do Christus dz  
sacrament eyngesetzet/ sprach er/ Das ist  
meyn leyß der fur euch geben wyrtt / Das  
ist meyn blutt dz fur euch vorgossen wirt/  
so offft yhr das thut/ so gedencft meyn da  
bey/ als sprecht er/ ich bin das heupt / ich

wil der erst seyn/der sich fur euch gibe/wil  
ewr leyd vnd vnfall mir gemeyn machen/  
vnd fur euch tragen/auff das yhr auch  
widderuß mir vñ vntereynander so thut/  
vñ alles last ynn mir vñ mit mir gemeyn  
seyn/ vñ last euch disß sacramēt/des alles  
zu eynem gewissen wartzeychen/das yhr  
meyn nit vorgesset / sondern euch teglich  
dian vbet vñ vermanet/ was ich fur euch  
than hab vnd thu/damit yhr euch sterckē  
muget/ vnd auch eyner den andern also  
trage.

¶ Zum zehenden. Das ist auch eyn  
vsach / vnd die erst/warumb disß sacra-  
ment wirt vill mal gebrauchet / so man  
doch die tauff nur eyn mall brauchet. Den  
die tauff / ist eyn anheben vnd eyngang  
eyns neuen leben. Inn wilchan vbir die  
mass vil widderwertickeyt/ vns anstossen  
mit sunden/mit leyden/fremden vñ eygen/  
da ist der teuffell/ welt/ eygen fleysch vnd  
gewissen/wie gesagt. Die horen nit auff /  
an vnterlass/ vns zu iagen/vnd treyben.  
Der halben/wir bedurffen sterck/ beyständ/  
vnd hulff Christi vnd seynes heyligen/  
wilch vns hyrinne wirt zu gesagt/als yñ  
eynem gewissen zeychen / da durch /wir

mit yhnen werden vereynigt vnd eynge-  
leybt/ vnd alle vnser leyd ym die gemeyn  
gelegt. Derhalben geschichts auch/ das  
denen/ die nit vnfall haben oder on angst  
sind/ odder yhr vngluck nit fñlen/ diß heylig  
sacrament nit nutz ist / odder wenig/  
denn es nur den geben ist / die trost vnd  
sterck bedurffen / die blöd hertzen haben /  
die erschrocken gewissen tragen / die von  
sundē anfechtung leyden/ oder auch dieyn  
gefallen sind. Was solt es bey den freyen  
sichern geystern wircken/ die seyn mit durf-  
fen noch begeren? Denn es spricht die  
Mutter gottis. Er erfüllet nur die hunge-  
rigen / vnd tröstet die geengistet sind.

¶ Zum eylfften. Darumb auff das  
die Jünger yhe würdig vñ geschickt wur-  
den zu diesem sacrament/ macht er sie zu-  
vor betrübt / hielt yhn für seyn abscheyd  
vnd sterben/ daran yhn leyd vnd wee ges-  
schach. Dartzu erschreckt er sie fast/ da er  
sagt. Eynes vnter yhn wurd yhn veriat-  
ten. Da sie so voller betrübniß vnd angst  
waren / mit leyd vnd sund der verretterey  
bekümmert / waren sie würdig/ vñ gab yhn  
seynen heyligen leychnam vnd sterck sie  
widda. Daran er vns leret/ das diß sacra



ment / eyn sterck vnd trost sey / der / die sund  
vnd vbel betrubē vñ engisten. Das auch  
sanct Augustin spücht. Dize speyß sucht  
nur eyn hungerige seel / vñnd fleugt nichts  
so fast / als eyn volle satte seel / die seyn mit  
darff. Also müsten die Jndē das oster  
lamb mit bitter lactucken essen / eylend vñ  
stehend / darynn auch bedeuht ist / das diß  
sacrament begirige bedürfftige vñnd be  
trübte seelen sucht. Tu wer yhm will vñ  
soll gemeyn machen / Christus vñnd aller  
Christē vnfall / wer der warheyt bey steen /  
vnrecht weren / der vnschuldigen nott vñ  
aller Christen leyden mit tragen / der wirt  
vnfall / vñnd widderwertickeyt gnug sins  
den / on das yhm selb / die böß natur / die  
welle / der teuffel vnd sund anlegt teglich.  
Vnd gottis rad vnd will auch ist / das er  
vns mit so vill hui. den iagt vñ treybt / vñ  
allenthalben bitter lactucken bereydt / das  
wir nach dieser stercke sollen vns sehnen /  
vñ des heyligē sacramēts fro werdē / auff  
das wir seyn würdig (d3 ist) begirig seyn.

¶ Zum zwelfften. Will chi es  
auch darumb vil mal gepraucht haben /  
das wir seyn gedenccken / vñ seynem exem  
pell nach / vns vben ynn solcher gemeyn  
schafft. Denn wo das exempell / mit mehr

wurde furgehalten / wurde die gemeyn-  
schafft auch bald vergessen / als wy: itze  
leyder sehen / das vill Messen gehalten wer-  
den / vnd doch die Chustliche gemeyn-  
schafft / die da solt geprediget / geübt / vnd  
ynn Christus exempel fur gehalten werdē /  
gantz vntergehet / so gar / das wy: fast nit  
mehr wissen / wa zu dis sacrament diene /  
vnd wie man seyn brauchen soll. Ja ley-  
der durch die messen vill mal die gemeyn-  
schafft zu stören vnd alles verkeren. Das  
ist schuld der prediger / die nit das Euang-  
gelium noch die sacramēt predigen / son-  
dern yhre menschen geticht / vō manichers  
ley wercken / vnd weyßen wol zu leben.  
Aber vortzeytten vbet man dis sacrament  
also woll / vnd lerete das volck diese ges-  
meynschafft / so woll vorstehen / das sie  
auch die eusserliche speyß vñ güter zusam-  
men trugen ynn die kirch / vnd alda auff-  
teyleten denen / die dürffrig warē / wie Pau-  
lus. 1. Cor. 11. schreybt. Daher noch blißen  
ist / das wortlein / Collecta / ynn der Mess /  
das heyst / eyn gemeynsam lüg / gleych als  
man eyn gemeyn gellt samlet / den armen  
zu geben / da worden auch souill mar-  
ter vñ heyligen / da warē weniger messen /  
vnd vil

vnd vil sterck odder frucht der messen. Da  
nā sich eyn Christen des andern an/stund  
eyn dem andern bey/hatt eyn mit dem andern  
mitleydē/ trug eyner des andern pūrd  
vñ vnfall / das ist nu verblichen vñ sind  
nur vill messen / vnd vill diß sacraments  
empfangung/ on alle seyner bedeutung ver-  
stand vnd vbung.

¶ Zum dreytzehenden. Man finde  
yhr wol/die gerne wollē mit niessen, wol-  
len aber nit mit gellen / das ist / sie hören  
gerne/das ynn dißem sacramēt/yhr hülff  
gemeyn vñd beystandt aller heyligen zu  
gesagt vnd geben wirt. Aber sie wollen nit  
widderumb auch gemeyn seyn/wollen nit  
den armen helffen / die sunder dulden / fur  
die elenden sorgen / mit dem leydenden ley-  
den/ fur die andern bitten / wollen auch  
nit der warheyt beystehē/ der kirchen besse-  
rung vnd aller Christen / mit leyß/ gutt vñ  
ere suchen vñd forcht der welt/das sie nit  
vngunst/schadē/schmach / oder den todt  
leyden müssen/ so doch gott will haben/  
das also sie vñd der warheyt vñd des  
nehesten willen gedungen werden/zur be-  
gürde solcher grosser gnade vnd sterck diß  
sacraments. Das sind eygennützigē mens-

3

schen/den diß Sacramēt nichts nutz ist/  
Gleich als der burger vntreglich ist / der  
vō der gemeyn wolt beholffen/beschützt/  
vnd Befreyet seyn/vnd er doch widderumß  
der gemeyn/nichts thū nach dienē. Meyn/  
woy müssen der andern vbel widder vnser  
lassen seyn/ wollen woy das Christus vñ  
seynē heyligen/vnser vbel sollen yhr lassen  
seyn/ßo wirt die gemeynschafft ganz/vñ  
geschicht dem sacramēt gnug. Denn wo  
die lieb nit teglich wechset/vñ den mēschen  
also wandelt/das er gemeyn wirt yder  
man/da ist diß sacramēts frucht vnd Bes  
deutung nicht.

¶ Zum vierzehenden. Solch ges  
meynschafft zu bedeuten/hatt gott auch  
solch zeychen dißes sacramēts eyngesetzt/  
die sich allēthalben dahyn fügen/vñ mit  
yhren formē vns zu solcher gemeynschafft  
reyzen vnd bewegen. Denn zu gleich als  
auß vielen kornlin zu sammen gestoßen/  
das brott gemacht wirt/vnd vieler kornet  
leybe eyns brotts leyb werden / darynn eyn  
iglich kornlyn seyn leyb vnd gestalt ver  
leuret/vnd den gemeynen leyb des brotts  
an sich nympt. Desselben gleichen auch  
die weyn kornlyn / mit verlust yhrer ges

stalle/ werden eyns gemeynen weyns vnd  
trancck's leyß. Also sollen/ vnd sind wir  
auch/ so wir diß sacramēt recht brauchē/  
Christus mit allen heyligen / durch seyne  
liebe/ nympt vnser gestalt an / streytt mit  
vns vidd der die sund / todt/ vnd alles vbell  
dauon wir ynn lieb entzūdet/ nemen seyn  
gestalt / verlassen vns auff seyn gerechtia  
ckeytt/ leben vnd selickeytt/ vnd sind also  
durch gemeynschafft seynes güter vñ vn  
sers vnglück's/ ein kuche/ eyn brot/ eyn leyß  
eyn trancck/ vnd ist als gemeyn. ¶ Das ist  
eyn groß sacramēt/ sagt S. Paulus. Das  
Christus vnd die kirch eyn fleysch vnd eyn  
gepeyn sind. Widderumb sollē wir durch  
die selb lieb vns auch wandeln vnd vnser  
lassen seyn aller ander Christē gebrechen/  
vnd yhr gestalt vñ nottdurfft an vns ne  
men/ vnd yhr lassen seyn/ alles was wir  
gutes vermugē/ das sie desselben genießē  
mugen/ das ist recht gemeynschafft vnd  
ware bedeutung dis sacraments. Also  
werden wir ynn eynander verwandelt vñ  
gemeyn durch die liebe / on welche keyre  
wandel nicht geschehen mag.

¶ Zu funffzehēden/ hatt er diße zwo

B ij

gestalt des brotts vnd weyns / vorandern  
eyngesetzt / weytter anzutzeygen die selbe  
vereynung vñ gemeynschafft / die ynn di-  
ßem sacrament ist / denn keyn ynniger tief-  
fer vntzuteyliger vereynüg ist / vñ die vor-  
eynigung der speyß mit dem der gespeysset  
wirt. Syntemal die speyß geht vñ wirt  
verwandelle ynn die natur / vnd wirt eyn  
wesen mit dem gespeyssten. Ander vereyni-  
gung / als durch negel / leym / band / vñ der  
gleychen / machen mit eyn wesen vntzurtey-  
lig auß den voreynten dingen. Also auch  
wyr mit Christo ynn dem sacrament ver-  
eyniget werden vñ mit allen heyligen eyn-  
geleybet / das er sich vnser also an nympt /  
fur vns thut vñd leset / als were er / das  
wyr sind / was vns antrifft / auch yhn / vñ  
mehr denn vns antrifft. Widderumb / wyr  
vns seyn also mügē annehmen / als were  
wyr / das er ist / als denn auch endlich ges-  
chehen wirt / das wyr yhn gleych formig  
werden / als S. Johānes sagt. Wyr wis-  
sen / wenn er wirt offenbart werdē / so wer-  
dē wyr yhn gleych seyn. So tieff vñ gātz  
ist die gemeynschafft Christi vñ aller heyl-  
ligen mit vns. Also fechten yhn an vns  
her sund. Widderumb / vns beschirmet

seyne gerechtikeyt. Denn die vereynigung/  
machts alles gemeyn / also lang / bis das  
er die sund yn uns gantz vertilge / vñ yhm  
selbs uns gleych mache am iungste tage.  
Also auch sollen wir ym vnser nehsten  
vnd sie ym uns / durch die selben lieb ver-  
eynigt werden.

¶ Zum sechzehenden. Wir das al-  
les / hatt er dise zwö gestalt nit bloß noch  
ledig eyngesetzt / sondern seyn warhafftig  
natürlich fleysch ym dem brott / vnd seyn  
natürlich warhafftig blutt yn dem weyn  
geben / das er yhe eyn volkommens sacramēt  
odder zeychen gebe. Denn zu gleych als  
das brot ym seynen warhafftigen natür-  
lichen leychnam / vñ der weyn ym seyn  
natürlich warhafftig blutt verwandelt  
wirt / also warhafftig werden auch wir  
ym den geystlichen leyß / das ist ym die  
gemeynschafft Christi vnd aller heyligen  
gezogen vnd verwandelt / vnd durch dis  
sacrament / ym alle tugende vñ gnad  
Christi vnd seiner heyligen gesetzt / Gleych  
wie droben gesagt ist von eynem burger /  
der ym d' statt vnd gätzen gemeyn / schutz  
vnd freyheyt wirt gezogen vñ gewan-  
delt. Darumb hatt er auch nit alleyn eyn

gestalt gesetzt / sondern unterschiedlich  
seyn fleysch vnter dem brott / seyn blutt vnter  
dem weyn / an zuzeygen / das nit alleyn  
seyn leben vñ gutte werck die er durch das  
fleysch antzeygt / vñd ym fleysch gethan  
hatt / sondern auch seyn leyden vñd mar-  
ter / die er durch seyn blutt antzeygt / ym  
welcher seyn blutt vergossen ist / alles vn-  
ser sey / vñ wy: dareyn gezogen / des messen  
vñd brauchen mogen.

¶ Zum sibentzehenden. Auß dem  
allen ist es nun klar, das diß heylig sacra-  
ment / sey nicht anders / denn eyn göttlich  
zeychen / darinne zugesagt / gegeben / vñd  
zu geeygent wirt / Christus / alle heyligen  
mit allen yhren wercken / leyden / verdin-  
sten / genaden vñd gutern / zu trost vñd sterck  
allen / die ym engsten vñd betrübniß sind /  
verfolget / vñ teuffel / sunden / welt / fleysch  
vñ allem vbel. Vñ das sacramēt empfa-  
hen / sey nit anders denn desselben alles be-  
geren vñd glauben festiglich / es geschehe  
also .

Ziekompt nun das dritte stück des  
sacraments / das ist der **GLAUBE**. da  
die macht an ligt. Denn es ist nit gnug /  
das man wisse / was das sacrament sey



vñ Bedeutte. Es ist nit gnug/ das du wiss  
fest/ es sey eyn gemeynschafft vñ gnediger  
wechffel odder vermischung vnser sand  
vnd leyden mit Christus gerechticheyt vñ  
seyner heyligen. Sondern du muusst seyn  
auch begeren vnd festiglich glawben/ du  
habst es erlangt. Zie sich der teuffel vnd  
die natur am meysten/ das der glawb nur  
mit bestehe. Etlich vben yhre kunst vñ sub  
tlicheyt/ trachtē wo das brot bleybt/ weñ  
es ynn Christi fleysch verwandelt wirt  
vnd der weyn yn seyn blutt. Auch wie vn  
ter so eynem kleynē stuck brots vñ weyns/  
müge der ganz Christus/ seyn fleysch vñ  
blutt/ beschlossen seyn. Da leytt nit an ob  
du das nit suchest. Es ist gnug/ das du  
wiffest / es sey eyn göttlich zeychen / da  
Christus fleysch vñ blutt warhafftig  
ynnen ist / wie vñ wo / laß ym befohlen  
seyn.

¶ Czu achtzehēden. Zie sich zu/ das  
du den glawbē vbest vñ sterckest/ das weñ  
du betrübt bist od dich deyn sunde treybē/  
also zum sacramēt gehest/ oder mess ho  
rest / das du begerest hertzlich diß sacra  
ments vnd seyner bedenttüg/ vnd nit dar  
an zweyfflest / wie das sacramēt deuttet/

B iij

So geschech dyr/ dz ist/ das du gewis sey  
est/ Christus vnd alle heyligen treten zu  
dyr/ mit allen yhren tugenden / leyden vnd  
gnaden mit dyr zu leben/ thun/ lassen/ leya  
den vnd sterben/ vnd wollen gantz deyn  
seyn/ alle ding mit dyr gemeyn habe/ wozu  
stu diesen glauben wol vben vñ stercken/  
so wirstu empfindē/ wie ein frolich/ reich/  
hochzeytlich mall vñ wol leben/ dyr deyn  
gott auff dem Altar bereyt hatt. Da wirstu  
verstehen / was das groß mal Rünis  
gis Assueri bedeut. Da wirstu sehen/ was  
die hochzeyt ist/ da gott seyn oxsen vnd  
mastfihe aberhan hatt/ wie ym Euanges  
lio steet. Da wirt deyn hertz recht frey vnd  
sicher/ starck vnd mütig/ widder alle feyns  
de. Denn wer wolt sich furchten fur allē  
vnfall/ so er gewis ist / das Christus mit  
allen heyligen bey yhm sey/ vnd mit yhm  
alle ding gemeyn habe/ es sey böß od gutt/  
Also lesen wozu Act. 2. das die Jünger  
Christi/ diß brott brochen vnd assen/ mit  
grossen freuden yhres hertzen. Die weyl nu  
das werck so groß ist / das die kleynheyt  
vnser seelen nicht dürfft begeren / schroeyg  
denn hoffen odder gewarten. Ist es nott  
vnd gutt/ das man vill mall zum sacras

ment gehe/ odder yhe ynn der messe teglich  
solchen glauben vber vnd stercke/ daran  
es alles ligt/ vnd vmb seynen willen auch  
eyngesetzt ist. Denn wo du dran zweyffel  
list/ thustu gott die grösste vneere/ vñ ach  
tist yhn für eynen vntrewen lügner/ kanstu  
mit glauben so bitte drum/ wie drobe ym  
andern Sermon gesagt ist.

¶ Zum neunzehenden. Danach  
sich zu/ das du auch yderman dich erge  
bist gemeyn zu seyn/ vnd yhe niemad ym  
haß odder zorn absonderst/ denn diß sa  
crament der gemeynschafft/ lieb vnd eyni  
keyt/ mag mit zwitteracht vnd vneynkeyt  
dulden. Du must der andern geprechen vñ  
dürffe dyr zu hertzen lassen gehen/ als we  
ren sie deyn eygen/ vnd deyn vermügen dar  
bieten/ als were es yhr eygē/ gleych wie dyr  
Christus ym sacrament thutt/ Das heyst  
durch lieb ym eyn ander verwandelt wer  
den/ auß vielen stücken eyn brot vñ tranck  
werden/ seyn gestalte verlassen/ vñ eyn ge  
meyne annehmen. Daher kompt es/ das  
affereder/ fremel richter vnd anderer mens  
chen veracher/ müssen den todt am sacra  
ment empfangen wie S. Paulus. 1. Cor. 11.  
schreybt. Denn sie thun mit yhren nehesten

wie sie suchen bey Christo / vñ das sacra-  
mēt auß roeyset / Gōnen yhn nichts guts /  
haben mit mit leyden mit yhn / nehmen  
sich yhn nit an / wie sie doch wollen von  
Christo angenommen seyn. Fallen dar-  
nach ynn die Blindheytt / das sie nit mehr  
wissen ynn diesem sacramēt zuthun / denn  
wie sie Christū gegenwertig furchten vñ  
ehren mit yhren Bethlin vñ andacht. Weñ  
das geschehen ist / so achten sie / es sey wol  
ausgericht. Szo doch Christus seynen  
leyb darumb gegeben hatt / das des sacra-  
ments Bedeutung / die gemeynschafft vñ  
lieb geübt wurde. Vñ seynen eygen  
natürlichen corper geringer achtet / denn  
seynē geystlichē corper / dz ist / die gemeyn-  
schafft seynē heyligē / yhm auch mehr dar-  
an gelegen ist / sonderlich ynn diesem sa-  
crament / das der glaub seynē vñ der heyl-  
ligen gemeynschafft wol geübt vñ starck  
ynn ons werd / vñ wye der selben nach /  
auch vnser gemeynschafft wol vben. Die-  
se meynung Christi sehen sie nit / vñ ges-  
hen teglich hyn / halten vñ horen messe  
ynn yhrer andacht / Bleyben eynter tag wie  
den andern. Ja werden teglich erret / vñ  
fulens nit. Darumb schaw auff / es ist

byr mehr nött/das du des geystliche/ denn  
des natürlichen corpers Christi acht ha-  
best/vñ nötter der glaub des geystlichen  
denn das natürlichen corpers. Denn der  
natürlich on den geystlichen hilfft nicht  
ynn diesem sacramēt/ es muß eyn verwan-  
delung da geschehen vñnd geübt werden  
durch die lieb.

¶ Zum tzwentzigsten. Es sind yhr  
viel / die dieses wechsels der lieb vñnd des  
glaubens ungeachtet / sich dar auff ver-  
lassen / das die mess od das sacramēt sey/  
als sie sagen, Opus gratū opere operati/  
das ist/eyn solch werck/das vō ym selbst  
gott wolgefallet/ob schon die nit gefallen  
die es thun. Darauß sie denn beschliessen/  
das dennoch gutt sey vill mess haben/wie  
vnwürdiglich sie gehalten werden / denn  
der schade sey derē/ die sie vnwürdig halltē  
oder brauchen. Ich laß eynem yden seynen  
syn/aber solch fabelē gefallē myr nit. Den  
also zu reden / so ist keyn creatur / noch  
werck/dz nit vō ym selbst gott wol gefal-  
le/wie Gen. 1. geschrieben stett. Gott hatt  
alleseyne werck angesehen /vñnd haben ym  
wol gefallen. Was frucht kommet da-  
von / so man brott / weyn / gollt vñnd

alles gut vbel braucht/wie wol sie an yhn  
selbs gott wolgefallen/ Ja vordānis fol-  
get darnach. Also auch hie/yhe edler das  
sacramēt ist/ yhe größer schaden auß seys-  
nem mißprauch kōmet vbir die ganzen  
gemeyn/ denn es ist nit vmb seyner willen  
eyngesetzt/dz es gott gefalle/sondern vmb  
vnsrer willē/ das wir seyn recht brauchē/  
den glawben dran vben/vnnd durch das  
selb gott gefellig werdē. Es wirckt nichts  
vberall/wenn es alleyn opus operatū ist/  
denn schaden. Es muß opus operantis  
werden/gleich wie brott vñ weyn wirckt  
nichts denn schaden / so man seyn nicht  
braucht/sie gefallen gott an yhn selb / wie  
hoch sie mügen. Also ist nit gnug/ das  
das sacrament gemacht werde ( das ist  
opus operatum ) Es muß auch praucht  
werden yn glauben( das ist opus operā-  
tis. Vnd ist zubesorgen/ das mit solchen  
ferlichen glosen des sacraments krafft vñ  
tugent/von vns gewand werden/vnd der  
glawb ganz vnter gehe / durch falsche  
sicherheyt des gemachten sacramentis.  
Das kōpt alles daher/ das sie mehr Chri-  
stus natürlichen corper ansehen yn diesem  
sacrament / denn die gemeynschafft / den

geystlichen corper / Christus am Creutz /  
war auch eyn gemacht werck / das gott  
wol gefiel / aber es seyn droß gefallen die  
Juden bis auff disen tag / darumb / das  
sie nit eyn prauchlich werck ym glawben  
drauß machten. Drumb sich zu / das das  
sacrament dyr sey / eyn opus operatis / das  
ist eyn prauchlich / werck / vñ gott gefalle /  
nit vmb seyns wesens willē / sondern vmb  
deyns glawbens vnd guten prauchs wil-  
len. Das wort gottis ist auch gott ge-  
fellig ym yhm selbs / es ist myr aber sched-  
lich / wo es gott auch nit ym myr gefellet.  
Vnd kurtz vmb / solch geschwetz / opus  
operatum / opus operatis / sind vergebene  
menschē wort / mehr hynderlich denn fur-  
derlich. Vnd wer mocht alle graßam-  
missprauch vnd missglawben erzelen / die  
ym disem hochwirdigen sacrament teg-  
lich sich mehien / deren eyns teyls so geyst-  
lich vnd heylig sind / das sie nahend eynem  
Engell muchten verführen. Kurtzlich wil-  
cher do will die missprauch erkennen / der  
setz yhm nur fur / den obgesagte prauch vñ  
glawben dises sacraments. Nemlich /  
das eyn betrübt hungerige seele soll seyn /  
die lieb / hülffe vnd beystandt der ganzen

gemeyn / Christi vnd aller Christenheyt  
herzlich begere / vnd die selben zu erlangen  
mit zweyffele ym glauben / darnach sich  
auch yn d' selben lieb gemeyn mache yder  
mā. Wer daher mit Reuht vñ ordenet seyn  
mess horen oder lesen vñ sacramēt empfa-  
hen / der yret vnd braucht mit seliglich dis  
sacraments. Darumb wirt auch die welt  
mit pestilenz / frygen / vnd ander gewo-  
lichen plagen vberfallē / das wyz mit vie-  
len messen nur mehr vngnad erwecken.

¶ Zum eyn vnd zwentzigistē / Zu  
mercken wyz / wie nott dis sacrament des  
nen sey / die ynn den todt / odder ander fer-  
lickeytt leybs vñ seel sich gebē sollen / das  
sie nit alleyn darinne verlassen / sondern  
ynn der gemeyn Christi / vñ aller heyligen  
gesterckt werden. Darumb Christus auch  
dasselbe ynn der letzten nott vñ ferlickeytt  
seyner Jünger eynsetzt vñ gab. Die weyll  
wyz denn alle sampt / teglich vmbgeben  
mit allen ferlickeytten vnd zu letzt sterben  
müssen / sollen wyz goet dem Barmher-  
zigen / auß allen kressen / lieblich vnd de-  
mütiglich dancken / das er vns eyn solch  
gnedigs Beychen gibt / daran er vns furet  
vnd Reucht (so wyz mit dem glaubē dar



an fest hangen) durch notte vnd alle ferli-  
ckeyt/ zu ym selbst zu Christo vñ alle heyligen  
Derhalben es auch nutz vnd notte  
ist/ das die lieb vñ gemeynschafft Christi  
vnd aller heyligen verborgen/ vnsichtlich  
vnd geystlich geschehe / vnd nur eyn leyp-  
lich/ sichtlich/ eußerlich zeychen derselben  
vns gegeben werde/ den wo die selben lieb/  
gemeynschafft / vnd beystandt offentlich  
were/ wie der menschen zeyttlich gemeyn-  
schafft / so wurden wir da durch nit ges-  
sterckt noch geübt / ym die vnsichtlichen  
vnd ewigen gutter zu trawen / odder yhr  
zu begeren/ sondern wurden vill mehr ges-  
übt/ nur ym zeyttlich sichtliche guter zu  
trawen/ vñ der selben so gar gewonen/  
dz wir sie nit gern farē lieffen / vñ gott nit  
weytter folgeten/ den so fern vns sichtlich  
vñ begreyfflich dinge furgigē / da durch  
wir verhyndert wurdē / das wir nymmer  
mehr zu gott kemē. Den es muß alles zeyt-  
lich vñ empfindlich ding abfallē/ vñ wir  
yhr gātz entwonē/ sollen wir zu gott kom-  
men. Darumb ist die mess vñ dis sacra-  
ment eyn zeychen / daran wir vns vben  
vñ gewonen / alle sichtliche lieb / hulff  
vñ trost/ zuverlassen/ vñ ym Christum/

vñ seyner heyligen vnſichtliche lieb hülff  
vnd beyſtand zuerwegen. Denn der todt  
nympt alles ſichtlich ding / vñnd ſcheydt  
vns von den menschen vñnd zeyttlichen  
dingen / ſo muſſen wir da gegen haben  
hilff der vnſichtlichen vnd ewigen / vñ die  
werden vns ym ſacrament vnd zeychen  
angeben / daran wir mit dem glauben ſo  
lange hangen / biß wir ſie erlangen auch  
empfindlich vnd öſſentlich.

Alſo iſt vns das ſacrament / eyn furt /  
eyn brück / eyn thür / eyn ſchiff / tragbar yñ  
wilcher vnd durch wilche wir von diſſer  
welt faren yns ewige leben. Darüß ligt es  
gar am glauben / denn wer nit glerobt /  
der iſt gleych dem menschen / d vñß was  
ſer faren ſoll / vnd ſo verzagt iſt / das ehe  
nit trawet dem ſchiff / vñ muß alſo bley-  
ben / vñnd nymmer mehr ſelig werden / die  
weyll er nit auff ſitz vnd vber faren will /  
das macht die ſynlickeyt / vñ der vngeübte  
glaub / dem die fart ſarv wirtt / vber des  
todts lordan / vnd der teuſſill auch grab-  
ſamlich dartzu hilfft.

Zum zwoy vnd zwenzigſten. Diß  
iſt bedeyt vorzeyttē Joſue. 3. Da die kin-  
der von Iſrael waren durchs rote Mehe  
mit trocken

mit trocken füßen gegangen/darvnn die  
Tauff bezeygt wart / ginge sie auch also  
durch den Jordan/aber die priester stund  
den mit der Arca ym Jordan / vnnnd das  
wasser vnter yhn verfloss / das vber yhn  
erhub sich wie eyn bergk / darvnn dis  
sacrament bezeygt ist. Die priester tragen  
vñ halten die Arca ym Jordan/wenn sie  
vns predigen vnnnd geben dis sacrament/  
Christum vnnnd aller heyligen gemeyn  
schafft/ynn dem sterben odder ferlickeyt/  
so wy: denn glauben / so vergehen die  
wasser / die vnter vns sind / das ist / die  
geyrtlichen sichtlich ding thun vns nit/  
sondern flyhen von vns. Aber die vber  
vns seyn/erheben sich hoch / das seyn die  
grewlichen stößz vnd bilden ym sterben/  
von yhener welt/erschreckē vns/als wol  
ten sie vns vberfallen / so wy: aber vns  
nit daran keren/ vñ mit eynem feste glaus  
ben surüber gehen / so kommen wy: mitt  
trocken füßen on schaden yns ewig lebē.  
Also haben wy: / das zweyfürnemliche  
sacramēt sind ynn der kirchen. Die tauff  
vnd das brott/die tauff furt vns ynn eyn  
new leben auff erdē/ das brott leytet vns  
durch den todt/yns ewige leben. Vnd die

C

zwey seyn bedeut durch das rote Mehl:  
vnd Jordan/ vnd durch die zwey lender  
ienseyt dem Jordan vñ disseyt des Jor-  
dans. Darumb sprach der herr ym abent  
essen. Ich werde diß weyns nit mehr trin-  
cken/ biß das ichs new mit euch trinck yn  
meyns vaters reych/ so gar ist diß sacra-  
ment gericht vñnd geordenet zur stercke  
widder den todt/ vnd zum eyngang yns  
ewig leben.

¶ Zum beschliessen/ Ist die frucht  
dieses sacraments/ gemeynschafft vñ lieb  
da durch wy: gesterckt werden / widder  
todt vnd alles vbell. So das die gemeyn-  
schafft zweyerley sey. Eyne das wy:  
Christi vñnd aller heyligen genyssen. Die  
andere/ das wy: alle Christen menschen/  
vnßer auch lassen genyssen/ wazynne sie  
vnd wy: mügen/ das also/ die eygēnützi-  
ge liebe seyns selbsts durch dis sacrament  
auß gerodtet/ eyn lasse die gemeyn nützigē  
liebe aller menschen / vnd also durch oer-  
liebe verwandlung eyn brott/ eyn tranck/  
eyn leyp / eyn gemeyn werde / das ist die  
rechte Christliche brüderliche eyneckeyt.

*man si ist  
wenn man  
sich die  
hütet  
als ein  
als ein*  
Darumb wollen wy: nu sehen / wie sich  
die groß gleyssende Brüderschafften/ der  
itz so vill sind/ hie zu gleyche vñ reymē.

*ist die  
als die  
Christen  
als ein  
als ein*

# Von den Bruders- schaften.

¶ Zum Ersten / wollen wir die bö-  
ßen vbung der Bruderschaften ansehen.  
Vnter welchen ist eyne / das mā cyn fressen  
vnd sauffen anricht / lest cyn meß oder  
etlich halten / darnach ist der gantz tag  
vnd nacht / vnnnd andere tag dartzu / dem  
teuffell zu eygen geben / da geschicht nie  
mehr / den was gott mißfellt. Solch wü-  
tende weyß hatt d böße geyst eyngetra-  
gen / vnd lest es eyn Bruderschaft heysen /  
so es mehr eyn luderrey ist / vnd gantz eyn  
heydenisch / va eyn sewisch wesen. Es  
were vill besser das keyn Bruderschaft vnn-  
der welt were / denn das solcher vn-  
fug geduldet wirt. Es sollten wellich herin  
vnd stette / mit d geystlickeyt dartzu thun /  
das solchs abthā wurde / den es geschicht  
gott den heyligen vnd auch allen Chri-  
stē groß vnehre daran / vnnnd macht gottis  
dienst / vnd die feyertag dem teuffell zu ey-  
nem spott. Denn die heyligē tag soll man  
mit gutten wercken feyern vnd heyligen /  
vnnnd die Bruderschaft soll auch eyn bö-  
se

¶ ij

derliche versamlung seyn gutter werck/  
so ist es worden eyn gelt sammeln zum  
Bier/Was soll vnser lieben frawen/Sant  
Annen/sant Bastian/ odder ander heylig  
gen namē bey deyner brüderschafft thun/  
da nit mehr denn fressen/ sauffen / vnnütz  
gelt verthun/ plerren/ schreyē/ schwezen/  
tanzen vnd tzeit verlyren ist. Wenn mā  
eyne saw zu solcher brüderschafft patro  
nen setzet/ sie wurde es nit leyden. Warū  
versucht man denn die lieben heyligen so  
hoch/ das man yhren namen zu solchen  
schandē vnd sunden mispraucht/ vñ yhre  
brüderschafft mit solchen bösen stücken  
verunehret vnd lesteret. We denen / die  
das thun vnd guthun verhengē.

¶ Zum andern. So man eyne  
Brüderschafft wolt halten/ sollt man zu  
sammen legen/ vnd eyn tisch oder zween  
armer leutt speysen/ vñ den selben dienen  
lassen/ vmb gottis willē/ sollt den tag zu  
worn fasten/ vñ den feyttag nüchtern bley  
ben/ mit betten/ vnd ander guten wercken  
die tzeit hyn bringen/ da wurde gott vnd  
seyne heyligē recht geehret/ da wurd auch  
Besserung auß folgen vnd gutt exempell  
den andern geben / odder sollt das gelt/

das man verfauffen will / zu sammen le-  
gen / vnd eyn gemeynen schatz sammeln /  
eyn iglich handwerck fur sich / das man  
ynn der noth / eynem dürfftigē mithand-  
wercks man / anzulegen helffen vnd ley-  
hen kundt / oder eyn iung par volcks des  
selben handwercks / von dem selben ges-  
meynen schatz / mit ehren auß setzen / das  
werden rechte brüderliche werck / die got  
vnd seynen heyligē / die brüderschafft / an-  
genem machtē / da bey sie gerne patronen  
seyn würden. Wo mā aber das nit thun  
will / vnd der alten laruen nach folgen.  
Vermane ich doch / das mā solchs nicht  
thu / auff der heyligen fest auch nit vnter  
yhiem oder der brüderschafft namē / Man  
neme eynen andern wercke tag / vnd lasz  
der heyligen / vnd yhiem brüderschafft  
namen mit Friden / auff das sie nit eyn mall  
zeychē. Wie wol keyn tag on vnehre mit  
solchem weßen wirt zu bracht / soll man  
doch der fest / vñ heyligen mehr schonen.  
Denn solche brüderschafft lassen sich  
der heyligen brüderschafft nennen vnd  
treiben des teuffells werck darunder.

¶ Zum dritten / Ist eyn andere  
böse gewonheyt ynn den brüderschafft

C iij

ten/ vñnd ist eyne geystliche Bosshet/ eyn  
falsche meynung/ die ist/ das sie meynen/  
yhrer bruderschaft soll niemandt zu gutte  
kommen/ denn alleyn yhn selbst/ die ynn  
yhrer zal vñnd register sind verzeychnet  
odder dartzu geben. Dife verdäpte böse  
meynüg ist noch erger denn die erste Bosshet/  
vñ ist eyn vsach/ warumb gott ver  
henge/ das auß den bruderschaften eyn  
solcher gottis spott vñnd lesterung wirt/  
mit fressen vñ sauffen vñnd des gleychen.  
Denn darynne lernen sie sich selbst suchē/  
sich selbst lieben/ sich allein mit erewenn  
meynen/ der ander nit achten/ sich etwas  
bessers duncken/ vñ mehr forteyll bey got/  
für den andern vermessen. Vñnd also  
gehet vñtter die gemeynschafft der heylia  
gen/ die Christliche liebe/ vñnd die grunts  
lich bruderschaft/ die yn dem heyligen sa  
crament eyngesetzt ist/ also wechsyt yn yhn  
eygēnuzige liebe/ das ist nit anders dan  
das man mit den selben vielen euserlichen  
wercklichen bruderschaften/ strebt vñnd  
storet wyder die eynige/ yinnerliche/ geyst  
liche/ wesenliche/ gemeyne aller heyligen  
bruderschaft. Wan dan gott sicht/ das  
verkeret wesen/ so verkeret er es auch wy



derumb/als ym . 17 . psalm stehet . Mit  
dem vorkereten verkerestu dich/ vñ schickt  
es also/ dz sie sich myt yhren bruderschaftē  
selbst zu spot vñnd schanden machen /  
vñnd von der gemeynen bruderschaft d  
heyligen/der sie wyderstreben/ vñnd nit mit  
yhr ynn gemeyn wircken/ verstosset/ yn yre  
fressige/ seufferische/ vnzuchtige bruders  
schaft/auff das sie das yre finden /die nit  
meher/ dan das yre gesucht vñnd gemeyn  
net haben/ vñnd dennoch sie verblendet/  
das sie solchen vnlust vñnd schande nit  
erkennen/ vnter der heyligen namē sulchē  
vnfug schmucken/als sey es wol gethan .

Ober dasselb etlich so tieff yn abgrūd  
lest fallen / das sie offentlich rumen vñnd  
sagen/welcher ynn yrer bruderschaft sey/  
müg nicht verdampft werden/ gerade als  
were die taußf/ vñnd sacrament von gott  
selbst cyngesetzt/geringer vñ vngewisser/  
dan das sye auß yren blinden köpffen er  
dacht haben. Also soll gott schenden vñ  
blendenn / die seyne fest / seynen namen /  
seyne heyligen/ mit nachteyll der gemeynē  
Christlichē bruderschaft/ die auß Christi  
wundē geflossen ist / schmehē vñ lestern/  
mit yren dollen wesen / vñnd serwischen

C iij

prauch yhier brüderschafften.

¶ Zum vierden. Darumb eynen rechten verstand vnnnd prauch zu lernen der brüderschafften. Soll mā wissen vnd erkennen / den rechtē vnterschied der brüderschafften. Die erste ist die gottliche / die hymelische / die aller edlste / die alle andere vber tritt / wie das golt vber tritt Kupfer odder Bley / die gemeynschafft aller heyligen / dauon droben gesagt ist / ynn wilcher wyr alle sampt / Brüder vñ Schwester sind / so nah / das nymmer mehr Keyn neher mag erdacht werden / denn da ist eyn tauff / eyn Christus / eyn sacramēt / eyn speyß / eyn Euangelium / eyn glawb / eyn geyst / eyn geystlicher coiper / vnd eyn iglich des andern glidmaß / Keyn ander brüderschafft ist so tieff vnd nah / Denn natürlich Brüderschafft ist wol eyn fleyßch vnd blutt / eyn erbe vnnnd eyn hawß / aber muß sich doch teylen vnd mengen / ynn ander gebliid vnnnd erbe. Die parteysche brüderschafften / die haben wol eyn register / eyn meß / eynerley guttwerck / eyn beyt / eyn gelle / vnnnd als nu geht / eyn Bier / eyn fressen vnd eyn sauffen. Vnd reycht Keyn nit so tieff / das sie eynen geyst mache /

denn den macht Christus bruderschaft  
alleyn / darumb auch / so sie grösser / ge-  
meyner vnd weytter ist / yhe besser sie ist .  
Sollen nu alle andere bruderschaften / so  
geordenet seyn / dz sie die erste vnd edliste /  
stett veraugē habē / die selben alleyn groß  
achten / vñ mit allen yhren werckē / nichts  
eygens suchen / sondern vmb gottis wil-  
len die selben thun / gott zu erbitten / das er  
die selben Christenliche gemeynschafft vñ  
bruderschaft / erhalte vnd besser von tag  
zu tage . Also wo eyn bruderschaft sich  
erhebt / sollē sie sich also lassen ansehen /  
das die selben fur andere menschen erauß  
springen / fur die Christēheyt / mit Betten /  
Fasten / Almoßen / guten wercken / etwas  
besonders zu thun / nit yhren nutz noch  
lohn suchen / auch niemand ausschlahen /  
sondern wie freye diener / der gantzen ge-  
meyn der Christenheyt zu dienen . Wo  
solch rechte meynūg were / da wurd gott  
auch widderumb rechte ordenung gebē /  
das die bruderschaften nit mit schlēme-  
rey zu schanden wurden . Da wurd gebe-  
nedeyung folgen / das man eynen gemeyn-  
nen schatz möcht sammeln / damit auch eu-  
serlich andern menschen geholffen wurd .

C v

Denn gynnge geystlich vnd leyplich werdt  
der bruderschaften ynn yhem rechten  
orden. Vnd wilcher diser ordenung ynn  
seyner gemeynschafft/nit will folgen dem  
radt ich / er spring er auß vnd laß die bruders  
chaft anstehen / sie wirt yhm an leyb  
vnd seel schaden.

Szo du aber sprichst / soll ich nit ettw  
was besonders ynn d bruderschaft vbers  
kommen / was hilfft sie denn mich: Antwa  
wort / ya wenn du ettwas besonders su  
chist / was hilfft dich denn auch die bruders  
chaft odder schwesterschaft dazus  
Diene du der gemeyne vnd andern mens  
chen damit / wie die art der liebe pflegt  
so wirt sich deyn lohn fur die selben lie  
be wol finden / on deyn suchen vnd begir  
de. Szo aber dyr der liebe dienst vn lohn  
geringe ist / so ist es eyn tzeychen / das du  
eyn verkerete bruderschaft habist. Die lie  
be dienet frey vmbsonst / drumb gibt yhr  
auch gott widderumb frey vmbsonst al  
les gutt. Die weyl denn alle ding ynn der  
liebe müssen geschehen / sollen sie anders  
gott gefallen / so muß die bruderschaft  
auch ynn der liebe seyn. Was aber ynn  
der liebe geschicht / des art ist / das niche

sucht das seyne / noch seynē nutz / sondern  
der andern / vnd zuuor der gemeyne.

¶ Czum funfften. Widder auff  
das sacrament zu kommen. Die weyll  
denn itzt / die Christliche gemeynschafft  
also vbell steht / als noch nie gestanden  
ist / vnd teglich mehr vnd mehr abnympt  
ynn den vbersten am aller meysten / vnd  
alle orter voll sund vnd schanden sind /  
solltu nit das ansehen / wie vil messen ge-  
schehen / odder wie oft das sacramēt wirt  
gehandelt. Denn dauon wirt es ehe erger  
denn besser / sondern wie vill du vnd an-  
dere zu nehmen / ynn der bedeutung vnd  
glauben dieses sacraments / darynne die  
besserung gar ligt. Vnd yhe mehr du dich  
befindest / das du ynn Christus vn̄ seynen  
heyligē gemeynschafft eyngelēbet wirst /  
yhe besser du stehst / das ist / so du befindest  
dich / das du starck wirst ynn der zuuer-  
sicht Christi vnd seynen lieben heyligen /  
das du gewiß seyest / sie lieben dich / vnd  
stehn bey dir ynn allen nöthen des lebens  
vnd sterbens. Vnd widderumb / das dir  
zu hertzen gehe aller Christen vnd der  
ganzen gemeyn abnehmen oder fall / ynn  
eynem yglichen Christen / vnd deyn lieb

eynem yglichen gemeyn werde / vnd wolu  
ust yderman gerne helffen / niemandt hasa  
sen / mit allen mitleyden vnd fur sie bitten.  
Sich so geht des sacraments werck recht /  
so wirstu gar vill mall weynen / klagen  
vnd trawen fur den elenden standt der  
heutigen Christenheyt. Sindestu dich  
aber solcher zuuersicht nit zu Christo vn  
seynen heyligen / vnd dich die nottdurffe  
der Christenheyt / vnd eyns iglichen neh  
sten nit ansicht noch bewegt / so hutt dich  
fur allen andern gutten wercken / do du  
sonst meynst scum zu seyn vnd selig zu  
werden. Es werden gewislich lautter  
gleyssen / scheyn vnd triggerey seyn / denn sie  
sind on liebe vnd gemeynschafft / on wil  
che nichts gutis ist / denn summa summa  
rum / plenitudo legis est dilectio / die lieb  
erfullet alle gepott. **A M E N.**

**E**s sind etlich / die diesen Sermon /  
on alle nott verworfen haben / drum  
das ich ym dritten Artickell gesage hab.  
Es dunckt mich seyn / wo eyn Christlich  
Conciliū verordenete / beyde gestallt yder

man zu geben. Haben auch das maull  
so weytt auffthan / das sie sagen. Es sey  
eyn yrtum vnd ergerlich. Das erbarm  
gott ym hymell / das wy: die tzeit erlebt /  
da Christus der edle Herr vnd Gott / von  
seynē eygen volck so offēlich geschmecht  
vnd gelestert wirt / das seyn ordnung /  
eyn yrtum gescholten wirt. Es were  
gnug gewesen / das man es ließ bleyben  
eyn zugelassen ordnung / vnd so man yhe  
keyn gepott drauß machen wolt / das es  
doch auch nicht fur eyn verpott odder  
yrtum gehalten wurd. Ich hab  
auch erfahren / das meyne schrifft werden  
nur von denen verworffen / die sie nie ge  
lesen noch lesen wollen / den selben laß  
ich meynen gruß sagen / vnd thu yhn wisa  
sen / das ich yhr blind freuell vteyll nicht  
achte / Vnd nit gesynnet byn zu leyden /  
das sie my: meynen Herrn Christum so  
frech / eynen yrtigen / ergerlichen / auffrü  
rischen meyster / verdammen vnd lestern /  
die weyll my: Gott das leben leßit / dar  
nach sie sich mügen richten.






Jah 62. 65<sup>7</sup>  
=

(x 227 0542)







Inches 1 2 3 4 5 6 7 8  
 Centimetres 1 2 3 4 5 6 7 8

**Farbkarte #13**

**B.I.G.**

Blue	Cyan	Green	Yellow	Red	Magenta	White	3/Color	Black
[Blue patch]	[Cyan patch]	[Green patch]	[Yellow patch]	[Red patch]	[Magenta patch]	[White patch]	[3/Color patch]	[Black patch]

6

Von  
 igen  
 es

2020

*Handwritten text in Gothic script, including a signature and a date.*